

1 Basef Amama Pol Nagi' Nanda'am Mafe'ma Timoti

Basef bandami Pol nagı' nanda'am mafe'ma Timoti

1:1-2 Pol nanda' basefa Timoti ma God noloma Kraıs Jısas
mıgiambamana

1:3-2:26 Pol na'ıpa Timoti ma nonda' maol Godı andeande'

3:1-17 Esıs Kristen sıtu la'ıfısa sefa' nımanımı nımeguf akutaimı ma
epes hıesi sosambala basef Godı

4:1-8 Pol na'ıpa Timoti mehipa nowalıpasa basef Godı andeande'
nınıfelısa sonda' waf bu'unai

4:9-22 Basefa Pol nanda' kot maloma basef akutaimı

1 ¹⁻²Ae' Pol anda' basef mafe'mago ine' Timoti, ae' okom nainailına. Ine' nembale'efa God dei' nataga nogalome ae'inai. Okom Godı atona dei' ape aposel Jısas Kraısi. Basef Kraıs Jısaı endılısımı atom, nase'apa ambal namunai ape' mape la'ıfıpa maloma Anan. Ae' a'ı amam bıam mıgiambamena na'a ea' mutı uwahıpına monda' okom ine'inai nope awanena.

Ape' ina ambagof aoma basef Jısaı, owa'

³Esıs ihase ae'ası saıla waf Godı, dei' ae' wapoti' ailana. Ea' malogel nape opaf ae' nomonı ina nıhi'ambe anona waf aonai anda'anai, owa'. Beten ae'anai owamb alıp la'ela'ef ae' okom napomena anıfela God.

⁴Ae' okom napoma embıf maluwi naep ine'ımı, okom nohafel endılısı a'ı ata' efo'o ıtılına endanıfel endılısı. ⁵Ae' okom napoma bale'ef ine'inai, anama endılısınai, ina baso'omunai, owa'. Bale'ef anama fowa' nalı' napoma iha'mena ine'ıkwi Loıs kwaloma mama'wena Yunıs. Ea' egawa endılısı, bale'ef anama dei' napoma ine' wapoti'. ⁶Fowa' ae' awamona lagofa balaga ine'inai ma God nase'ena presen bu'unai ananınai. Ea' dei' a'ı efela okom ine'inai ma okom nopoma presen anama napoma ine' nımafıana notaga la'ıfına sı'ı sufapula nıf fıandom lu'um. ⁷Ambal

Bu'unai God nase'apanai ina nonda'apa umbamohapa, owa'. Anan nase'apa waf anama mitu la'ifipamanai ma ukup mimila enis epes ea' mumafi alop ape'inai andeande'. ⁸Ine' owa' ambal aona ni'ipasa basef Dembinai apa'inai, owa'. Ea' ina ambal aona ma ae' wapoti', owa'. Ae' anda' maola Dembinai dei' anda' kalabus. Ine' nefa' pepel Godi ma netaga la'ifina nefa' nimanimi nelome owalapa basef bu'wami Ananimi. ⁹God nofa'apa mutanimani mope andeande'. Anan nofalapa amam nematawa ananipai atepa mope bo'wepa andeande'. Anan ina okom napoma waf bu'unai ape' manda'anai nofalapa, owa'. Okom Ananinai atona nainailapa nofalapa nagiambama na'a. Fowa' dambadamba ina dei' nanda' etap, ata' owa', Jisas Kraiis nandahomapa nagiambama na'a. ¹⁰Ea' dei' nogota anae' Kraiis Jisas nafi'i nofa'apa motanimani, anan nataga alihina. Dei' maol ananinai God nagiambama na'a nanda'apa mataga la'ifipa mataga alihim. Kraiis Jisas nikila' ga', ea' basef bu'wami Godi mihima'mapa ambal namunai nape andeande' la'ela'ef. ¹¹Anan nali' nandandepe anda' maol anama awalapa basef bu'wami Godi ma epes hiesi. Ae' aposel God nasapa'e awalapa basef Ananimi, ae' tisa dembiwei anda' maol Jisasi. ¹²Amama atom dei' efa' nimanimi amama. Ea' ae' ina ambal aona ma amama, owa'. Ae' egawa aman anama embale'efanai. Ae' egawana endilisi anan la'ifinai ma numafi amamaga hiami moloma epes hiesi ananisi ae' ase'anas lagof ananimi. Ea' amama mope bo'om andeande' mefe' motagama nemaf anama lu'unai notaga. ¹³Basef amama bu'wami ine' name'ama malogel ae'anai, basef amama si'i anona ikwaf bu'unai ma nihi'ambena waf bu'unai newalipasa epes. Ine' nembale'efa Jisas Kraiis endilisi ea' okom ninilana nenda' waf na'ama nembale'ef la'ifina ma basef amama. ¹⁴Nimafi basef amama bu'wami endilisi God nase'enam lagof ine'imi ma nimafiam. Ambal Bu'unai Godi nape nomona ape', nigiambama numafina ma maol anama. ¹⁵Ine' negawa epes hiesi sape etap hiagoma Esiai, saloma amam biam Figelus naloma Hermogenes sakwahowe safe'. ¹⁶Ae' anda' betena Dembinai ma ata' niti Onesiforus naloma wambota ananinai uwahipis. Dei' main, anan la'ela'ef nanda' okom ae'anai nape andeande'. Anan ina ambal aona ma ae' anda' kalabus, owa'. ¹⁷Anan nafi'i Rom nanda' maol lu'unai nagolope nogota laona ea' natolowe. ¹⁸Ae' anda' betena Dembinai ma niti anan uwahipina nemaf anama bu'unai. Anan nagiambame nimeguf hiami wambel anama Efesus, amama ine' negawam andeande'.

Ine' nepe si'i soldia bu'unai nanda' maol Kraiis

2 ¹Nogalome ae'inai, la'ela'ef ine' nepe la'ifina ma Kraiis Jisas nigiambama na'ama pepel anama naso' ape' mape la'ifipa ma Anan. ²Basef hiami ine' name' fowa' awalapama naep epes hiesi, amama newalapama anom amam bu'wami mogawa basef andeande'i ma mi'ipa

enis epes andeande'. ³Ine' nepe la'ifina endilisi si'i soldia naitu la'ifina nila Krai Jisas. Nefa' nimanimi amama neloma afa' anofa soldia ananifai ma maol anama Godi. ⁴Aman anama nape si'i soldia, ina nahapila maol naninani, owa'. Nanda' maol anama soldiai bu'unai atona ni'i dembinai soldia ananinai okom ninila maol ananinai. ⁵Na'ama etin, emi aman nondondombam noloma enis nosagih, nila waf anama esis sasagihanai. Ama nikila' nofa' amamaga amama bu'wami sasagih sikila' sefa'ami. Ea' i'i anan owa' nigi'ma waf anama sasagihanai andeande', atuwasi ina nofa' amamaga amama, owa'. ⁶Aman nanda' maol lu'unai aofi ma numafi aof andeande' nambimb nili' nela' gwa'aimi aof anama nisila' enis epes. ⁷Ine' okokoma basef amama a'iami. Nambimb Dembinai nomboma okom ine'inai, ea' negawa basef amama hiami ofagema. ⁸La'ela'ef ine' okom nopoma Jisas Krai, anan naga' notanima nohafel wapoti'. Anan wambota anama Deviti, si'i a'iams basef bu'wami Godi. ⁹Ae' awalapa basef amama bu'wami. Amama atom dei' sa'i ae' aowei, sase'e nimanimi lu'wami mamumami. Sanda'e anda' kalabus wapoti'. Ea' basef Godi ina manda' kalabus mape, owa'etin. ¹⁰Ea' anda' okom ae'anai nataga la'ifina ma aitu la'ifiwi la'ela'ef igiambama epes isima God nosahe'as ea' Ananisi. Ae' a'i God nigiangbama esisa nofa'as sotanmani ma Krai Jisas soloma howalagon pepel nape la'ela'efi. ¹¹Basef amama endilisi ape' mombale'efam la'ifipa. Basef amama.

I'i endilisi ape' moga' molomana, anona nemaf mohafel mope namepa molomana wapoti'. ¹²I'i ape' mope la'ifipa mofa' nimanimi lu'wami, anona nemaf mope si'i king molomana. I'i mowa' alafugahana, Anan wapoti' anona nemaf nowa' alafugahapa. ¹³I'i ape' mi'i ape' alupupai Ananipai milana, ma owa' milana, ea' ape' hapaipai. Ea' Anan atona naila basef Ananimi endilisi andeande'. Ina anona nemaf nokwaham nombaso'mas, owa'.

**Amam manda' maola God endilisi, agof amamumi
mataga mandawalapa naep Godi**

¹⁴La'ela'ef ine' nefela ukup asasimi ma basef amama. Ni'ipasa ma naep Godi amama. Ipe' ina pi'i basef pepa'am pelomasa basef mamumami, owa'. Waf anama ina nigiangbamas, owa'. Waf anama nambimb mohambombaga isima some'ami. ¹⁵Ine' nenda' maol Godi la'ifina netaga aman nanda' maol endilisi, ma ambal ine'inai ina aona ma maol anama, owa'. Nenda'ana na'ama ma God okom bo'ona ma ine' ma ni'i basef Ananimi bo'om endilisi. ¹⁶Ine' nihi'ama basef awami. Amama ina basef Godi, owa'. Basef amama nambimb monda' esis sofe' eaf anama aonai ma sowa' alafugaha God. ¹⁷Basef asasimi awami atom nambimb motaga lu'um si'i maselis awami, monda'as motaga lu'um endilisi. Tisa asasimi biam Himeneus naloma Filetus manda' waf anama, ma'i basef

mamumami wafimi. ¹⁸Amam amama mololama basef endilisimi ea' mal'iam ma'i, "Ape' motanima mohafel hi'agilif ea', ina ata' motanima mohafel wapoti', owa'."

Basef amama atom amam mahambombaga ukup la'ifimi enis epes sombale'efa Godi. ¹⁹Ea' dei' God nawa anona olaf la'ifinai dei' notawa. Olaf anama anom amef mailana ma'i na'ama ma'i, "Dembina' nogawa andeande'ma epes isima Ananisi." Ea' anom wapoti' ma'i, "Emi egafis sa'i agel Dembinai, sokwaha waf aonai."

²⁰Ipat lu'unai nomon dis amama hiami esis sanda' kapa bu'unai gol o siliwa main howalagon sanda'ami, anom sanda' lawah sanda'am, anom sala' etap sanda'ami. Anom sanda'ama maol bu'unai, si'i sanda' gwa'aimi sa'am. Ea' anom sanda'ama maol aonai falafunai, sala alufuta. ²¹Ea' dei' emi epen nekwaha waf aonai ma nepe bo'wen andeande', inima nambimb nepe si'i dis amama sanda' maol bu'unai atona. Ea' Dembinai nigiambaman nepe andeande' nenda' maol ananinai. Ea' enin nendandombam nenda' maol naninani bu'unai hianai. ²²La'ela'ef ine' nendafa'ma ukup amama awasimi mataga ma amam amama awomimi. Nenda' maol bu'unai la'ifina nembale'efa God nila waf bu'unai neloma okom nainaila enis epesanai. Ea' nila waf opaf awaninai, neloma epes isima opalef mape bo'om andeande' sofala Dembinai. ²³Ea' ine' newa' alafugama basef amama mamumami awami falafumi ma epes isima ukup mase'asi gawa a'asi. Ine' negawa basef amama atom mawalapa ukup mamumami wandafumi ma'i mandahihianamam. ²⁴Aman anama nanda' maola Dembinai ina ni'i anom basef wafimi nifitapam neloma enis epes, owa'. Anan niti amam nematawa hiesi uwahipis nose'as opaf. Anan nope dembinai tisa, nosopama okom wandafunai, nope niti esis sonda'mana waf aonai. ²⁵Anan nuwalipas sa'ombel nihi'amba andeande' epes isima sandaiwa'manai sosambala basef ananimi. Anan nonda' maol na'ama nigiambamas, anona nemaf somboma opalefa sogawa basef endilisimi andeande'. ²⁶Fowa' Satan naolo'as isag ananinai ma saila basef ananimi. I'i esis sogawa basef amama endilisimi, nambimb ukup asasimi motaga alihim wapoti' ma sokwaha isag anama Satani sifi'mai God.

Anona nemaf akutainai waf aonai hianai naninani notaga alihina

3 ¹Ine' negawa, nimeguf akutaimi nimanimi lu'wami endilisi motaga. ²Nimeguf amama epes ukup mopoma esis etis, ea' ukup mimila otamba atom, sefela agof asasimi atom, sototopa' basef, sonda' epes findiwasa God. Ea' sosambala basef mamasasi ahapas asasisi. Esis ina sinifela Goda waf bu'unai, owa'. Sosambala waf bu'unai. ³Ea' ina ukup mimila enis epes, owa'. Ina sokwaha waf aonai enis epes sanda'masanai, owa'. Esis ina ukup mose'asa lopa' fitap asasinai ma si'i basef awami, owa'. Ea' si'ipa enis epes si'i, "Ape' monda' waf aonai." Esis ukup mi'i

esis etis ina sumafi alop asasinai andeande', owa'. Sohambombaga epes isima bu'wasi, sowa' alafugah sondaiwa'ma waf bu'unai. ⁴Ea' sonda' alupusi asasisi sofe'ma lagof naumbih. Ea' esis mehipe sila waf aonai asas sanda'anai, ukup mopoma esis etis si'i dembesi. Ea' ukup maimaila danifel naninani aonai endilisi ma alop asasinai atona. Esis ina ata' ukup mi'i God, owa'. ⁵Epes isima saila waf Godi alop atona asasinai ande' atogon, ea' ukup asasimi nomon sandaiwa'ma God sowa' alafugaha pepel ananinai. Ine' nihi'ama epes isima.

⁶Anom amam si'i amama mandambaho' so'uso'umbel mafe' magi'ma nematawa awama ukup bu'wami owa' meapawai mawis ifagw awaumi, ea' momboma ukup awaumi. Nematawa awama waf awaunai nanda' ukup awaumi nimanim endilisi. Ea' ukup awaumi mohafema awami mamumami momboma ukup awaumi. ⁷Nematawa awama la'ela'ef wanda' maola ofa' basef, ea' ina ogawa basef ofagema endilisi, owa'. ⁸Fowa' Janes naloma Jambris^a manda' naumbih maloma Moses, mowa' alafugahana. Na'ama etin dei' epes isima sanda' naumbiha basef endilisi, sowa' alafugaham. Ukup asasimi aom endilisi, ea' bale'ef asasinai sambaso'am etin. Esis ina sembale'efa God endilisi, owa'. ⁹Ea' waf anama amamunai ina nataga lu'una endilisi, owa'. Dei' main, nambimb epes hiesi siti waf anama gawa a'anai amamunai si'i fowa' gani sati waf anama gawa a'anai ma amam amama Janes naloma Jambres manda'anai.

Ine' nembale'efa basef Godi la'ifina

¹⁰Ine' fowa' nafe' naloma ae', name' basef amama a'ipasang ea'. Ine' negawa fe' pe, ki ma basef hiami ofagema ae'ami. Ine' negawa ae' embale'efa God la'ifiwi, la'ela'ef a'ipasa basef Ananimi so'umbel, okom ae'anai ina wandafuna, owa'. Ine' negawa ae' okom nainaila enis epes, aitu la'ifiwi efa' nimanimi. ¹¹Ine' negawa waf aonai hianai esis sanda'meana ae' ma nimanimi amama efa'am wambel anama wenifina Antiok naloma Aikoniam naloma Listra. Ine' negawa amamaga nimanimi sanda'meam efa'ami. Ea' Dembinai natagahowe ma amamaga amama nimanimi hiami sanda'meami. ¹²Emi egafis sope la'ifis soloma Krai Jisas ma sila waf Godi andeande', naumbih asasisi anona nemaf sonda'as kwapete'as. ¹³Ea' amam awami maloma amam mambaso'ami nambimb mombaso'ma epes hiesi. Ea' anom amam mombaso'ma amam atom. Ea' waf amam manda'anai nambimb notaga aona endilisi.

¹⁴Ea' ine' nembale'efa basef amama Godi nefa'am la'ifina. Ine' negawa amam nematawa isima fowa' sawalipina basef na'ama. ¹⁵Ea' ine' negawa

a Esis Juda sa'i basef atom sa'i Janes naloma Jambres agofuma anom amam biam manda' maol maloma ambagof awami. Amam manda' maola dembinai king esis Isipi fowa' gani Moses nagiangama esis Juda. Niti Kisim Bek 7:22, 9:11.

amama wapoti'. Fowa' ine' ata' so'uso'win negawa basef bu'wami Godi mape Buk Baibeli andeande'. Buk anama la'ifina ma nose'ena gawa bu'unai neloma okom bu'unai ma ine' nembale'efa Krai Jisasa God nagiambamena nofa'ena netanimani. ¹⁶Ambal Bu'unai Godi atona nafela ukup amam profeti manda' basef amama hiami mape Buk Baibeli. Basef amama bu'wami ma mose'apa gawa bu'unai, mih'ambapa waf aonai ma mokwahona, mihi'ambapa fe' ape'inai, muwalipapa ma mila waf bu'unai. ¹⁷Basef amama manda' ape' epes Godi la'ifipa endilisi ma monda' maol hianai bu'unai Ananinai.

Ine' newalapa basef Godi endilisi

4 ¹Anona nemaf Jisas Krai nowaloga epes hiesi dei' ata' sape namisi, soloma isima saga'i wapoti'. Naep Godi maloma Krai Jisasi dei' a'ipina basef la'ifimi a'i Krai Jisas anona nemaf notaga nondawalap alihina naep epes hiesi ea' nope Dembinai wambel Ananinai. Amama atom dei' a'ipina mehipe, ²ine' ni'ipasa basef Godi la'ela'ef. Nemaf anama esis sondandombam ma some' basef, ni'ipasam. Ea' maina nemaf esis sandaiwa' ma some'am, ni'ipasam etin. Ni'ipasam ma mohagofa basef amama baso'maimi. Ni'ipasa basef la'ifimi ma sokwaha waf aonai esis sanda'anai. Ea' nefela ukup asasimi nenda'as sotaga la'ifisa bale'ef, niwalipasa waf aonai nenda'as so'uso'umbemas. Niwalipasa basef amama si'i okom Godi na'iami. ³Anona nemaf notaga, esis sandaiwa'ma sofa' basef bu'wami Godi, owa'. Ea' sila ukup asasimi atom sofa'ai anom tisa hiami asasimi, ma mi'ipasa basef amama esis isima ukup maimaila some'am aligah asasimi. ⁴Ea' sowa' alafugaha basef endilisimi seme' basef amama mamumami falafumi wafimi. ⁵Ea' ine' la'ela'ef okom nopeina andeande' nimafi alop ine'inai andeande'. Nemaf anama nimanimi motagamena nepe la'ifina nenda' maol Godi newalapa basef bu'wami ma esis amam nematawa sololama Godi. Nenda' maol anama ma nagiambamas nenda'ana endilisi nimbefana.

Pol na'i, "Dei' maol ae'anai na'i hi'ilana."

⁶Ine' negawa, nogota anama nataga ea' ma sehe ega'. Esimbel ae'ami ma'i kolo'olam molo sehe ega' ma indilali eso' ae' efe'ma God. Nemaf nataga ma ae' ekwaha etap anae'. ⁷Ae' fowa' andondombam asagih andeande'. Ae' embale'efa Krai la'ifiwi asagih andeande', dei' ataga ikwaf. ⁸Dei' amamaga amama bu'wami sasagih sikila'i sefa'ami sandandombam ma'ome. Amama na'ama. Nambimb Dembinai nofale ni'ipi ni'i, "Ine' aman bu'winai."

Dembinai anan aman bu'unai nowalogas ma nemaf anama. Nemaf anama lu'unai Anan nese'e amamaga amama bu'wami. Ea' ina noso' ae' atowe, owa'. Anan nose'asam emi egafis ukup maimaila Anan notaga nondawalap sotolona.

Anom basef tu'wanim

⁹Dei' ine' nifi'mai ae' mehip. ¹⁰Dei' main, Demas okom na'ina'i waf aonai etapanai ea' nakwahowe nafe' Tesalonaika. Kresens nafe' etap hiagoma Galesia, ea' Taitus nafe' etap hiagoma Dalmesia. ¹¹Dei' Luk atona nape nalome. Ine' ne'wa Mak nolomena nifi'i nehaponameana. Dei' main, andeande'ma anan nigiangbame ma maol Godi. ¹²Ae' asapa' Tikikus nafe' Efesus. ¹³Ine' nifi'i nifa'mai saket anama launai anama akwahona na'ih'i Troas ipat Karpusi. Anama ine' nifa'mianai nifi'i. Ea' anom buk ae'ami wapoti' nifa'miami. Buk amama sanda' agwafuh mafisim sanda'ami. Amama nifa'miam etin nifi'i endilisi.

¹⁴Aleksander aman nanda' maola brasi, nanda' megah endilisi. Anona nemaf Dembinai nogwamana nimanimi anan, mondahama waf anan nanda'meanai. ¹⁵Ine' wapoti' nindumafuma ma aman anama. Anan nahogofa basef amama afe'imi endilisi.

¹⁶Ali' agwa basefa kot anama esis sanda'meanai, ina enin epen etitin naitu nalome nemaf anama nagiangbame, owa'. Epes ae'asi hiesi sakwahowe. Ea' anda' betena God na'ama, a'i ina okom nopoma waf anama aonai esis sanda'anai ma sakwahowe nemaf anama anda' kotanai, owa'. ¹⁷Ea' Dembinai numafi ae' ape nase'e pepel. Amama atom dei' awalapa basef bu'wami a'iam la'ifiwi endilisi ea' epes isima hiesi owa' Judaisi sogawa basef Godi, dei' same'am hi'alas. Ea' God nagiangbame ma malogel mafin anama lu'unai laion. ¹⁸Anona nemaf Dembinai nigiangbame ma waf anama aonai hianai esis sanda'mianai, ea' nofa'e etanima nohapone epe wambel Ananinai gani ilif heven. Ae' a'i pepel howalagon nopaina la'ela'ef. Endilisi.

¹⁹Ine' nese'ago danifel ae'anai ma Akwila naloma Prisila ea' esis isima wambota Onesiforusi. ²⁰Erastus ata' napani etin Korin. Ea' Trofimus awes nanda'ana akwahona napani Miletus. ²¹Ine' nifi'i mehip. Na'ama ine' nepomai nemaf anama uf lu'unai naluwanai. Yubulus naloma Pudens, Linus naloma Klodia naloma esis alupusi Kristen isima hiesi sanda'menago danifel ma ine'. ²²Ae' a'i Dembinai nope nolomago ambal bu'unai ine'inai nigiangbamepa na'a. Ea' ma'um.